

John Harper
CHONG·MOTGIPA TITANIC-NI MATGRIK
(The True Hero of Titanic)

Rev.P.M.Sangma - Pastor NBC.

Kan-dike Aganchengani:

Rev.John Harper saksa Isolna ka·sagipa aro Jokatani Nama Kattako aganprakna siaona kingkingba maming janggi tangna misilani dong·pilgija agane sianggipa ong·a. Uni janggi tanganio mairongpilgipa Mandeni gita saksan sikdikdike ong·e sal somoiko re·atna nangahaoba, uni Nama Kattana on·kanganiko ontimintiba komiatjaha. Ua an·tangni janggiko Kristoni jokatani Nama Kattana mamingdakeba gamchatnikjaha, batesa siangenggipa janggirangna kaoksie an·tangni rangsitengkua dipetna aganprakaha. John Harper Britain, Ireland aro North America-o mongsonggipa uni janggi tangmitting somoio Isolni kattarangko aganprakaha.

John Harperni A·bachenggipa Janggi Tangani:

John Harper May 29th, 1872 bilsio namgipa Kristian nokdango atchiaha. Ua saksa sontolgipa aro je dakoba mamingnaba kengija matchote dakronggipa bi·sa ong·achim. March jani Robibar sal 1886 bilsio uni bilsu chigittam ong·o ua Jisu Kristoko an·tangni Jokatgipa aro Gitel ine an·tangni ka·tongo ra·chakaha. Uni Gitel Jisuko ra·chakani bilsu brini jamano chong·motan bilsu 17 ong·o ua Isolni dalbegipa Gitel Jisu Kristochi papirangko Unbaksa nangrimatani kamko aganprakna a·bachengaha. Uni dambemitting somoi sorokrangona re·ange Isolni Nama Kattako aganprakanide altua ong·jachim, maina sawa bingbang dakaikuenggipa Mandeni kattako knatimengchim, haida uko baleke chonike agan·balekesa roaiaha, indiba uarang pilakon Kristoni giminsan ine ra·chakrongaiaha. Uko jegitaba manderang mikchepe-on·chepe ra·china indiba ua jeko jokatani Nama Kattako aganprakengachim ua mamingdakeba chonggipa katta ong·ja uan salgio aro a·gilsako dalbatgipa kusini aro katchaani kattasa ong·a ine gisiktango donkamaiaha.

John Harper-ni Nama Kattana Janggi Tangani:

John Harper-ni janggi tanganio Isolni Katta uko bilsuen su·pongaha aro uni ka·tongo dingchike priripaha. Jensomoio dingtang dingtang Kristian dilgiparang uni bebera·ani japangko sing·achim unon ua *'Isolni kattao'* inesan aganchakrongaiachim. John Harper-ni dingtang dingtang sorokrang aro Industry-rango Jisu Kristoo Jokatani Nama Kattako aganprakengachim, unon salsao Rev.E.A.Carter London-o Baptist Pioneer Mission-ni dilgipa uko rimangaha. Uko indake Isolni kamko ka·na ine Rev-ni rimanganiara uni janggi tanga gimiko Isolna dangdike on·a uni ku·rachake bi·aniko Isolni chu·sokatanian ong·a ine ua bebera·aha. Ua Baptist Pioneer Mission -o kam ka·e bangija salrangni jamano member sak 25-chi Mondoliko a·bachengaha aro uko Reverend songaha. Ua Mondoli namen taraken dalrorogipa ong·e bilsu chigittam-ni jamano member sak-500 ona sokdoahaon ua somoio ua Mondolio gipin dilgiparangko don·eming ua an·tangde Mondolioni ong·kate jakgitele Nama Kattako aganprakna re·chakataha.

John Harperni Jikdong Debae Nokdang Dakani:

John Harper an·tangna jora ripengko ba una dakchakgipako nangani gimin uaba an·tangni gisik ka·tongna cha·napako aro uni mikronna nina nitoako baseaha. Uni namnike mikchae basegimin metrani bimingko Annie Leckie Bell jean Renfrewshire aro Govan-oni ong·achim, uamang sakgnini gisepo saksa sakgipino chu·ongnikgriken 1903 bilsio bia ka·aha. Indiba namen rasong gribee uamang bia ka·ani bangija bilsini jamano chongmotan January 8th, 1906 bilsio uni ka·sabegipa jikgipa jringjrotna nengtakna uko wate Isolni rim·angako man·aha. Isol kan·dikgipa somoio uni jikgipa baksa ong·mittingo banga patianirangko on·aha, uarangoni una nitogipa deme·chik·ko patiaha uni bimingko mingkalake NANA minga aro chu·gimik bimingde Annie Jessie Harper ong·achim. Ua January 03rd 1906 bilsio Govan, Lanarkshire Scotland-o atchiaha.

Bebegita Rev.John Harper-na namjabegipa salrangko aganode ua baditaba changna chio ga·aksruaha. Uni chonmittingo bilsigni jadok mamangsan ong·mittingoba chiakolo ga·akaha, indiba Isolni ka·saachi uni magipa uko jokatna man·aha. Aro uni bilsu 26 (kolgrikdok) ong·mittingoba tarakbegipa aro bilakbegipa sagalni chichi satpakange tu·begipa sagalona man·angaha unoba Isol uko jokataha. Bon·kame ua North Alantic sagalo Titanic jahasko dalbegipa tinka·gimin suurio nangtinge be·tongatanio uaba ka·sinbegipa sagalo sripe siaha. Indake uni kandikgipa janggi tanganio dukrangko cha·grongahaoba mairongpilgipa dalbegipa jokatani Nama Kattako gipatna Isol uko bilake jakkalaha. Uni bon·kamgipa salko cha·gronganiara 1912 bilsini April 14 waljatchio Titanic dalbegipa jahasni ka·sinchiktotgipa sagalo sripanio ong·aha.

Titanic Dalbegipa Jahas:

RMS TITANIC dalbegipa jahas namen ka·sinbegipa sagalo mikkangchi an·tangtangna mai ong·nasienga uko mamung u·isamsoanirang gri namen kusi ong·bee darangan songreangaha. Ua jahaso namen man·e cha·begipa aro daldalgipa mingsinggipa manderang songreangengachim.

Maina ua somoiode ua jahas-an a-gilsako dalbatgipa ong·achim. Man·e chagipa aro mingsinggipa jahasni nambatgipa aro dam rakbatgipa dringrango an·tangtangna a·kangtokaha. Saoba an·tangtangni bia ka·na am·enggipa mikchatang ka·satangtangko rim·bite, saobara bia ka·daldale kusi ong·e rona gita (Honeymoon) re·angtokengachim. Ua jahaso kangalrangba gngangchim indiba uamangde walo sagalni balwani balana sina chake bara gri kancha gri dake namen re·angeba duk man·e jahasni noksikrango komrot komtot dake tu·sitokengachim.

Jack aro Rose:

Joseph Dawson Dublin-o atchigipa jeni bimingko Titanic film-ko tarigipa James Cameron una Jack bimingko done Leonardo Dicaprio-ko dakmesokataha.¹ Nitobegipa metra Kate Winslet ong·achim jeni bimingkon film-o Rose ine dakmesokataha. Ua metrana saksa namen man·e cha·begipa panteko bia ka·e on·a gita uni magipa pagipa tik ka·manahachim. Ua nitobegipa metra una tik ka·gipa panteko namnikade ong·jakonchim ine nika maina walsao ua tubegipa aro ka·sinchiktotgipa sagalo bilonsrue sina dakengachim. Uko kangalbegipa pante noksa salna changbegipa jokataha. Ua somoionian uamangni nangrimanirang a·bachengaha aro jamano sakgnian namen ka·sanapgriksrangaha. Ua sakgni ka·sagrikkiparangni walni 11:40 P.M. bajio mikkang jajong Janie chame ro·mittingko jahasko chalaigipa Kalasirangba nikuake mikkangchi dalbegipa aro namen kenbegnigipa dalbegipa tin·kagimin suuriko niksojaha. Sepangmangmangona sokahaosa uamang nikaiaha, uno uamang jegita jahasni ki·meko pe·na jotton ka·beoba jokna man·teljaha. Dalbegipa jahas ka·sinchiktotgipa aro namen tu·begipa sagal jatchio dalbegipa tin·kagimin suurio su·tingeaha aro jahasni dokgipa gadangni pangchaknirangko bnekningataha. Ua be·prugimin kolgita ka·sinchiktotgipa chirang namen bil gnange tarakprete jokpongpongbaaha, aro bon·kamaode Jahas be·tongsrangaiha.

John Harper aro Uni Deme·chik Nana-ni Bon·kamgipa Somo:

Ua dalbegipa aro sripnasienggipa jahaso Rev. John Harper aro uni ka·sabegipa nitogipa bils dok mangmangsan ong·kuenggipa deme·chik Nana gngangchim. John Harper uni ka·sabegipa deme·chiko jokatani ring chongipaona rim·baaha aro ua taraken ringo an·tangko jokatna cholko nikaha. Jeon daldalgipa aro man·e cha·begipa mingsinggipa manderang an·tangtangko aro an·tangtangni dedrangko jokatna ringchongipako bangbea tangkarangko policerangna on·e ra·seksekpilengachim. Ua somoio kangalrangde mamung jokani cholan dongjaha. Mitamde an·tangtangko jokatna sakgipinni dedrangkoba angni ine a·kange ring chongipao gadona seksektokaiaha.

Ua somoio Rev. John Harper an·tangni ka·sabegipa deme·chik Nana-ni nitogipa mikrononi mikchi jingjang jingjang dakengako nikoba aro ua an·tangna Isolni patigiminrangoni gamchatbatgipa ong·a ine u·ieoba an·tangko mangrakate salgi nigitoje ja·sku dipane deme·chiko ku·dimchotchote aganaha, *'Na·a angko changsao salgio grongtaigen'*, ine agane deme·chikko Londonni me·chik saksa Miss. Jessie Wills Leitch minggipa jean Harperni nogipa nangachim unbaksa deme·chikko watataha.² Wal andalao salgini askirangni chengchetchet ting·sugipa Rev. John Harperni mikrononi mikchirang uni peona joksolbaenggipao teng·sudapaha. Haida uan mandeni bon·kamgipa duk ine aganmangen, ugita dakgipa duko darangba chakna am·rongja. Basakobade an·ching indakgipa somoio Isol maina angna indake dakjok ine chanchimanpilgen. Ka·siksike grapenggipa deme·chiko bon·kame jakpongo ra·e ku·dimchote ringo gatataha aro deme·chikgipa Nanani mikrononi mikchian tipjaengachim, aiao mairongpile andalgipa somoi chanchie uni janggi tanganiko poraiode poraigipan mikchi rakna man·teljawa. Mitamrangde ringna sekseke dakgripilengaha, saobade kenjagoke tu·begipa sagalchian bilonsrue siangtokenga. Manderangko indakmitting somoio ka·dimeatna Behalako salgiparang dingtang dingtang sulrangko sale nioba mamingchiba gisiko nangatna man·jaengaha, bonkamao uamangba don·tongsrangna am·engon uamangoni saksa dilgipa Wallace Hartley³ *'Nang' Sepang Ang' Isol'* ingipani sulko salatahaon Isolni Gisik rongtalgipani uamangni kosakona ka·dimeatna uamangni sepango ong·aniko ma·sina amaha. Rev. John Harper manderang janggi tangtangna chrikengako aro skime graptokengako knaatengachim aro uamang maikai jokatani man·gen ua an·tangni bil ama gita manderangna agana a·bachengaha.

John Harperni Siaona Jokatani Nama Kattako Aganprakani:

Jahas tonggni dake be·tongaha aro jedakgipa gadangni manderangba sagalo ga·aksruangtokaha aro uamangoni saksade John Harper-an ong·achim. Ua an·tangna chio balboatna man·a gita jacket-ko man·paachim. Ua amadipet iachi uachi jrobatange manderangko jokataha aro Jisu na·simangko jokatenga, aro mongsongbatede na·simangni janggirangko jokatgen uni Gitel Jisuko bebara·bo ine aganaha. Rev. Harper bon·kamao saksa chadambeko nikaha aro ua chonbegipa

¹ www.chasingthefrog.com... Accessed on 27-08-18 at 12:38 pm.

² <https://www.encyclopedia-titanica.org...accessed> on 27-08-18 at 11:25 Am.

³ www.history.com-news-thetitanic...accessed on 27-8-18 at 1:29 Pm.

bolplengo rimsikote sinana siangna dakengako nikaha. Uko Rev.Harper singaha? Na·a jokna chol dongama? Unon ua *‘Thing mamung chol dongja’* ine aganaha, *‘Indide iakai na·an angna bate iako nangbata’* ine agane an·tangni jokatani jacketko oke goataha, aro Rev.Harper sakgipinko jokatna jroangtaiaha. Bakan ua panteona re·bapile Jisu Kristoni gimin agane Jisuko ra·chakataha aro Isolo bi·chake don·angaha. Unoni ua jroangengon Rev.Harper namen bilgriroroangaha, maina uo da·ode jokatani jacketba dongjahani gimin chio balbona gita nengaha uni bilchisan jotton ka·na nangengahachim. Bon·kamao sagalni ka·sinbegipa balwa balana uni jakrang komtotangaha aro ku·rang ku·gapna rangsitna biba man·angrorojaha. Bon·chote ua uni amadipet chrikwate aganaha: *“Gitel Jisuko bebera·bo aro Jokatako man·bo”*. Uni be·enko balboatna uni jakrangko siksaknaba amjaha aro tu·begipa sagalo sripange jringjrotna Paa Isol baksa ong·na cholko man·aha. Haida ua *‘Salgioni indine ku·rangko knaaha:Sebo,Da·onin Gitelo sie sigiparang kusi ong·a; oe, Gisik agana, maikai uamang kamtangtangoni neng·takna man·gen; maina uamangni kamrang uamang baksa re·angpaa’* (Para.14: ·). Tom·tome uni kusik gamengkua dipetna chrikwate chrikwate Gitel Jisuko bebera·bo aro jokatako man·toke ine aganangkuaha, indiba namen ka·sinchiktotbegipa sagal uni ku·rangko chipakore satpakbae jripatangaha, aro ia a·gilsako jripmitip wate Pa Isol baksa ong·na mikchipangaiaha.

Titanic Jahasni Sripanio Jokrikgiparangni Tom·dakani:

Bilsu bri·ni jamano ua Titanic jahas·ni ga·aksruaoni jokgiparang tom·dakani ong·ahao Rev.Harperni jacketko gane Jisuko ra·chakgipa pante chakate mikchirang baksa agana a·bachengaha, ‘John Harper angna uni jacket on·jaode aro Jisu Kristoko ua somoio angna aganprakjaode da·alo anga iano chadengpana man·jawahchim’. Ua Rev.Harper maikai uko Jisuona dilbaaha uko ka·siksike agane namen grapbeaha.

A·gilsakni Watchangalako Man·ani:

Rev.John Harper mairongpilgipa Isolna ka·sagipa aro an·tangko on·kanggipa mandechim indiba Hollywood·o filmko ga·sue tarigipa James Cameron aro uni manderang Director·rang aro golpoko segiparang Rev.John Harper·ni gimin ritingna mangmang janapaniko on·ahama? Gamchatgipa boksir·rangko ua filmo kale actor·rang, actress·rang Oscar Award·ko man·aha, aro inditan a·gilsako mingsing mingamako man·beaha. Mairongpile Rev.John Harper watchangako man·aha. Indiba uni janggi tanganiara, *“Ripengtangni gimin an·tang janggiko on·chakana bate dalbatgipa ka·sara pilakon gri”*(Jn.15:13), ingipa Jisuni kattao gita mamungdakeba uni ka·tongoni chelangjaha. Chisolana una Isolni bil aro jokatani ong·aha. A·gilsako uko darangba gisik ra·jaha,Isolba gualgenma? Ongja ripengrang Jisu agana: *“Aro ia chongiparangoni saksana sninggipa ine chi kasinako rangkare gesa mangmang ringna on·gipana beben anga nasimangna agana,Ua mamung dakeba antangni mangniko gimaatjawa”*(Mt 10:42).

Deme·chikgipa Nana aro mondolini manderang Harper Memorial Baptist Mondoli ine Glasgow pagipako gisik ra·na mondolini bimingko 1921 bilsio donaha. Nana an·tangna jora ripengna Mr.Philip Roy Pont minggipa All Saints Bible College·o poraigipako London·o 1934 bilsio bia ka·aha, aro uamangna Isol dedrang sakgniko patiaha uamangara Gordon aro Mary jekon jamano Dr.Gurling ine mingjitaha.

Bon·kame Aganpaani:

Da·alo an·chingni gisepo indake on·kanggipa Missionaryrangko A·chik Mondolirango nangenga. Ia a·gilsak dalbegipa Jahasni Atlantic sagalo sripangani gitan daalo sripangengaha, bangbea janggirang an·tangtangna dakgriktokengaha. Bangbata a·gilsakni mingsinggipa aro skia man·begipa a·songrango janggirang chriktokengaha. Isolni katta an·ching sakantini ka·tongo doktikenga, “Anga sako wattagen, aro angna sawa re·anggen?” Isol nangko angko okkamenga. An·ching Gisik Rongtalgipani dilanichi okkamaniko man·on an·tangni ka·tongko rakatnabe. Siangengonaba Rev.John Harper Jisuni Jokatani Nama Kattako agananiko dondikjaha, an·chingara maikai sal somoirangko jakkalenga? *“Mikchi ong·e satgiparang kasroke ra·gen”* (Git.126:5) *“.....Mande jeko sata ukon ua ragen”*(Gal.6:7).
